

## **Paurongo Timoteo Yeac Warackibi Ohoec**

<sup>1</sup> Yesu Kristongo kurumenggac sing meficgenmeec, ye nga memengerecnina Anutu yereng denenec, ni Pauro Yesu Kristoac aposoro anai.

<sup>2</sup> Kibi yomoc negen negensinnu medacna Timoteo, geac ohogenduae. Anutu Mannina nga Kebunina Yesu Kristongo wosoefac nga ubamanggang amma ruaea gembeso.

<sup>3</sup> Ni Makedonia prowinsiu kembeso amma yoac yofi edeguai, ge Efeso mi wama imohai ngic goa yenearu kemma dede goa siriha mong mi kpouyemmegecdeac kpetariyemmebesena.

<sup>4</sup> Yeni nemusiduc nga esangabo keceregec yeneac kisis kpekecdaeac yoacngina engemmama anu Anutuac yoac negensinggecdeac sing waandae.

<sup>5</sup> Geng dederecgeyoac dena foraya yofi fingerude, Anutuac heresongongo ubaherengina mewakeu fagung madzaha kpac negen negengsingngina dindingac anude. <sup>6</sup> Goa yeni faka ifia fingerudeac mi negensima yoac sicsauc deandae. <sup>7</sup> Amma Anutuac dedeseriyoac edekpou anggecdeac homac ayemmeande. Yeni yenaoc yoac serima deandae, imocac hania mi negentegecdae.

<sup>8</sup> Mongngo dedeseriyoac sing dindingacfu mekefudeu imocngo fora gombunga meficgemiude.

<sup>9</sup> Ge yofi negembesena, dedeseriyoac imoc ngic dindingac kecdae, yeneac negemma mi faifaia. Imoc ine areng yofia yeneac

amma faifaia, ngicngac singyoac ngadehema ihoc bahoc amma Anutu ngadehema kecdae. Yeni kopocsic meficgema kpetiac kekec mi negensima bangecac wiacac songongina anude. Yeni nonggo mangfocngina yunukpebuc amma ngicngac yunuhomeandae. <sup>10</sup> Amma yeni kaisero nga ngicngo ngicfu sero ua meandae. Yeni ngicngac hamangec meyunuandae amma wanacngicngac bummeyunuma monggoc sueyunuandae. Amma yeni ine Anutuac kicfu yoac deserima ikocyoac dema ngicngac botucnginau ikocyoac deandae. Nga negen negeng dindingac kpoungemmeing, imoc ngicngac goa kpeandae. Dedeseriyoac imoc ngicngac ifia yeneac negemma faifaia fede. <sup>11</sup> Anutu ye kenec mingina ye kuc nga kibikperagiagoc. Yeng siduc gombang nenu uaya modacma mekecduae nga dedeseri kpekke areng yeni imoc ifingoc kpeandae.

<sup>12</sup> Kebunina Yesu Kristongo neac negenu ngereeu uayau naric fainuecac negemma kuc nengkecde, yeac dangge dekecduae. <sup>13</sup> Amma ni warac ye demanganema ngaba ammima habufora yunukporac ayemmekecma yarengic anai. Nga yeng sifu wosoefac anenec. Nocac ni faka fora mi negentegecma Yesu mi negensinggema sicsauc kefai. <sup>14</sup> Ifi kecbare Kebuninaac wosoefac nga heresongotoa yombang, imoc negen negensinggoc Yesu Kristoaranac nearu haec. <sup>15</sup> Yesu Kristongo bangecfu kopocsicmeme mengerenunuude nga komoc kpenideac maec. Yoac imoc seria nga fora amma ngicngac sasawango imoc negemma

hoanggegec ngereeude. Ni kopocsimeme sasawa feracyunuma ngic mangana yombong anai. <sup>16</sup> Ifi kecbare, ye modzotitia kpac fakaya imoc didiu fingectegerudeac wosoefaha kpenenec. Ifi anenu ngic yeneng negensinggema kekecseri megecdeac sosoha amma waraiyemmeai. <sup>17</sup> Ngictau wisic wisickea nga home homea kpac nga mi hengena ye mocgungo Anutu kecde. Ye eweheimima yeac dedengerec nga dedengerec fekengkecbeso, imoc fora.

<sup>18</sup> Medacna Timoteo, ngabafocnina yenigoc dzikac gombunga kpekecbesena. Ifi annadeac profete yoac gearu degec negennec. Imoc modacnadeac edeguduae. <sup>19</sup> Ge negen negensinggoc kecma herenegen negengga garenggena kpetiac febeso. Ngic goa yeni kekec kpetiac imoc wama negen negensinggina ukugec kpeu manganegec. <sup>20</sup> Nga yenearunac Himenaio nga Aresande, yeri Satangngo metingyuruudeac yeac mariu faiyuruai. Faiyuruaiac yeri Anutuac kpac monggoc mi denggbaringgeecde.

## 2

<sup>1</sup> Nenang ngicngac sasawa meficyununideac yeneac amma numuma Anutu dangge edebisina. Imoc ua engena ande, imocac yoac seria deduae. <sup>2</sup> Ngicngac yumea nga ruaegoc kecma Anutu eweheimima faka dindingac angkecdae, yeneac kekec gombunga. Nga ifi kecnideac ngictau nga enara tatacfu takecdae, yeneac amma numubisina. <sup>3</sup> Nunumunina ifia imoc gombunga, imoc Anutu memengerecninango negenu ngereeude. <sup>4</sup> Amma yeng ngicngac sasawa yeni komoc kpema

yoara fora negentegecgecdeac ammikecde. <sup>5</sup> Imoc yofiac, Anutu mocgungo kecde amma Anutu nga ngicngac botucninau hengisingngic mocgu kecde, ngic imoc kpara Yesu Kristo. <sup>6</sup> Ye yengenaoc ngicngac sasawa donina meudeac kekeha waec. Yoac imocac nasoya hau dekperagiu negenggec. <sup>7</sup> Ni yoac imoc dekperagibadeac Anutu yengenaoc meisinnuma aposoro fainuec. Fainuu yeac yoac negensinggema bangec monnunac ngicngac, yeni yoac fora edekpou ayemmeai. Imoc fora yombong, ikoc mi anduae.

<sup>8</sup> Neac negen negeng nga songo yofi anu ngic ngeneac deduae, ngic guruama noboc noboc kecdae, ngeni ngaba nga deendema yoacngina wama maringina kpetiac miacma numubisia. <sup>9</sup> Ni ifingoc ngac ngeneac yofi deduae, ngac ngeni memaemema wamba isinggema gombunga nga sirihau heibisia. Amma ngeni kibikereng meficgegecdeac kubu buma kuneng mi heibisia me orucdzongina mi mudzebisia. Nga ngeni wiac hania hania golngo memea mi faima wamba buma kuneng mi heibisia. <sup>10</sup> Ngac mong ye faka gombunga mekecma Anutu eweheihei ammiande, faka imocngo kibikerengngina ambeso. <sup>11</sup> Amma ngac ngeni faka yumea amma kpoukpou yoac negemma enac tofoc tofoho andacbisia. <sup>12</sup> Nga ngac yeneng edekpou angang me ngic yeneac enara anggecdeac mi negenduae. Ngac ngeni dekpeborong wama yumea kecbisia. <sup>13</sup> Anutungo hanahema Adang meficgema Ewa ngadeau meec. <sup>14</sup> Mangana minginango Adang faitobannu mi faiec. Ye ine ngac faitobannu faiu makpema

singyoac kpeec. <sup>15</sup> Ngac mong ye Yesu negensinggema kpetiac kecma ngicngac heresongogoc hoangyunukecma kekeha isinggeudeu ye sabac memeaac amma komoc kpeude.\*

### 3

<sup>1</sup> Ngic mong ye kpebung yeneac enara ua mebeso ammideu ye negen negenga gombunga, yoac imoc seria nga fora yombong. <sup>2</sup> Nga kpebunggac enara ye dindingac kecma ngac mocgusac yeac ngic ambeso. Amma ye kekeha nomana ambeso. Ye negen negentegecgoc yoac dema kekec siriha kecma ngicngac amayau heitaiyunubeso. Amma kpoukpou ua imocac sirc negembeso. <sup>3</sup> Ye waing doku nema ubasufu ngic mi kecbeso amma ye herebungic kecdeu mi ngereeude. Ye ngic yumea amma ruaegoc kecbeso nga hiedzoac songou negen negenga mi febeso. <sup>4</sup> Ye yengena enemmedacfora gombunga garengyunubeso amma yengena nambaracfora yoara tofohoma ewehihei ammigecdeac garengyunubeso. <sup>5</sup> Imoc yofiac, ngic mong ye enemmedacfora garengyunuudeac sing mi negendeu yeng Anutuac kpebung garengyunuudeac sing siriha ifingoc mi negenude. <sup>6</sup> Enarangina ye ubamereng gboriango mi ambeso. Mangana mingina ye sebienggac amma yoacfu makpeec ye ifi isoc makpebac. <sup>7</sup> Amma ngicngac yeneac kicfu game meficgebacac nga mangana minginaac

---

\* **2:15:** Pauro ye nocwiac negensima yoac yomoc ohoec, mitiac negen negengngic yeni imocac uba mocgu mi andae.

botacfu mendanggebacac ngicngac ngadeau kecdae, yeneng ifingoc eweheimigec ngerebeso.

<sup>8</sup> Kpebunggac enac tofoc tofoho ngic yeneng sirihau imocngoc faka nga angammemengina sirihau ambisia. Yeni nedzarangngina yohockang mekecdaeu mi ngereede amma waing dokuac songotoa negenggedeu mi ngereede amma hiedzo megedeac kichodungoc mi kecbisia. <sup>9</sup> Yeni ine here negen negengngina kpetiacgoc kecma negen negensinggac yoc keme kemea mekecbisia. <sup>10</sup> Ngic kpebunggac enac tofoc tofoho ngic ambeso ayemmede, ngeni yeneac haniangina hengising anggec nga ebicngina kpac anuguc kpebunnu enac tofoc tofoho ua naric mebisia. <sup>11</sup> Amma kpebunggac enac tofoc tofoho ngac yeni ifingoc faka nga angammeme sirihau mekecbisia. Yeni ngic me ngac monggac ngadeyoac degede, imoc mi ngereede. Kekecngina imoc nomana ambeso. Amma yeni dewa mong mi ambisia. <sup>12</sup> Nga kpebunggac enac tofoc tofoho ngic ye ngac mocgusacac ngic kecbeso. Ye yengena enemedacfora nga goa yegoc kecdae, imoc gombunga garengyunubeso. <sup>13</sup> Imoc yofiac, kpebunggac enac tofoc tofoho ngic ua gombunga mekecgec kpebung yeneng eweheihei ayemmegec, yeni Yesu Kristo negensinggema serima nanggede.

<sup>14</sup> Ni kibi yomoc ohogemma geac negensima gearu bic habadeac anende. <sup>15</sup> Nga uango dzegenuu bic mi habade isoc kpebunnu yeni sing dafiu kecbisia, imoc negembesena, imocac amma kibi yomoc ohoduae. Kpebung yeni Anutu kekehagoc, yec ama nga yoc foraac karu amma

wotung seria. <sup>16</sup> Negen negensinninaac hania imoc sufu sufuyau feec:

Ye kuneng nga engena yombong, imoc fora.

Ye sebiu fingectegerec nga Asungo haniaya dindingac imoc nonongkac mekperagiec.

Angero yeneng ye henggec.

Ngicngac yeni yeac siduc bangec monnunac ngicngac, yenearu dekperagigec bangec noboc noboc kenu negensinggec.

Ye Anutuac kuc nga kibikperagiau monggoc meemma ihai kecede.

## 4

<sup>1</sup> Naso wisic wisickeau ngic goa yeneng negen negensinggina ukugec kpeu, yeni hadehade yeneac kpoukpouyoac negenggec asu hania hania yeneng dekerec ayemmema ikocfu wangecyunugecde. Tiri Asungo imocac yoac didiu dekecede. <sup>2</sup> Anu ikocngic herenegeng negengngina dzadzu kpekpea, yeneng ngicngac dekerec ayemmema ikocfu wangecyunuma <sup>3</sup> ngac megecdeac kpae heiyemmema yakasege anggecdeac dederecge ayemmegecde. Anu ngicngac yeni Anutuac yoac fora negemma Yesu negensinggema kecdae, yeni yakangina ubangerecgoc megecdeacnoc Anutungo yakangina meficgeyemmeec nga yeni imoc sege anggecdeac ikocfu deandae. <sup>4</sup> Anutungo wiac deu fingecdarec, imoc sasawa gombunga. Nga wiac imoc ubangerecgoc mema mekecni, imoc neneacsoc ande. <sup>5</sup> Imoc Anutuac yoac nga nunumungo meu kpetiac anude.

<sup>6</sup> Ge tosofocnina yoac yomoc edekpou ayemmenadeu Yesu Kristoac kingangkpekpe gombunga annade. Kingang kpekpe ifia kecnadeu, negen negensinggac yoac kpougenggec modacnec, imocngo negen negengga meseriude. <sup>7</sup> Ge bangecac siduc hania hania ngadehema geangga kekecfu Anutuac faka nga sing imoc meseribesena. <sup>8</sup> Ngic ariac ambesonga sebingina meefaiandae, imocngo memefiha efeanecsac ande. Ngicngac yeni Anutuac faka nga sing meseriandae, imocngo kekecngina hafoa meficgeude, imoc yagucac kekec meseride nga kekec ngade haude imoc ifingoc meseriude, Anutungo ifi denemmeec. <sup>9</sup> Yoac imoc fora, ubanina ihai naric faini feu negensinggenide. <sup>10</sup> Anutu kekehagoc, yearu kpeketahema kecdimbe, yeng ngicngac sasawa yeneac memengerecnina ande nga ye negensinggedae, yeneac yombonnoc. Imocac amma uatoa kpendzenggoc mema kecdimbe. <sup>11</sup> Nga ngicngac yeni yoac imoc modacgecdeac seria edekpou ayemmebesena.

<sup>12</sup> Ge medacgbosing kecnecac mongngo geac negenggec mamea mi ambeso. Nga fakaga kpetiac nga dedega amma angammemega nga negen negensingga amma ngicngac heresongogoc hoangyunuannec, yeneng fakaga imoc hemma modacbisia. <sup>13</sup> Anu ngicngac yenigoc mitikibi osonegeng amma ubaherengina midima edekpou ayemmekecmana habade. <sup>14</sup> Nga enara yeneng maringina witigau faima profeteyoac degec Tiri Asuac wosoefacac kuc mong menec, kuc imocgoc



ua mekecna mi nomanebesona. <sup>15</sup> Nga ngicngac yeni yadiseri annec, imoc henggecdeac negen negengga uagau faina seriangoc feu imoc modacma mekecbesena. <sup>16</sup> Mekecma geangga garengemema yoc edekpou ayemmekecnec, imoc ifingoc garenggebesena. Ifi annadeu ge nga ngicngac yocga negengandae, ngeni ngenahafoc komoc kpegecde.

## 5

<sup>1</sup> Ge ngic yada mong yoc edebesonga dema kucgoc nga gereagoc mi ammima ubea midima mangga yoc edeannec, ifi isoc yoc edebesena. Nga medacgboosing yeni dacmunafocga yeneac ubangina midima angannec, ifi isoc ayemmebesena. <sup>2</sup> Amma ngac yada yeni nonggogaac angannec, siriha imocngoc ayemmebesena nga naroang yeni naingfocga yeneac angannec, siriha imocngoc herega kpetiac femanu ayemmebesena.

<sup>3</sup> Ngac hodzec memeficngina kpac kecdae, kpebung ngeneng yeni eweheihei ayemmema mefi-cyemmebisia. <sup>4</sup> Anu ngac hodzec mong ye nambaracforagoc me esaforagoc kefudeu yenaoc ine warac warac hodzecngina henggareng am-migeceac ua mebisia. Yeneng ifi amma nonggo mangfocnginaac turung kpouyemmebisia. Faka imocngo Anutuac kicfu ngereeude. <sup>5</sup> Nga ngac hodzec mongngo memefiha kpac tembuha kecma Anutungo meficmiudeac negenserima hadzing tofocnac numukefude. <sup>6</sup> Anu ngac hodzec mong sebiac songo modacande, ye ine sebiugengsac kecde nga ubahereugeng ine homemea kecde.

<sup>7</sup> Ngac hodzec yeneac yoac imoc ngicngac serian-goc edeyununadeu yeneac ubakpekpe naric mi fingerude. <sup>8</sup> Ngic mong ye sactosofora yeneng-gareng mi angande nga yengena nonggo mang nga dacmunafora ifingoc mi garengyunuudeu ye negen negensinga bic wama faka mangana amma bangec monnunac ngicngac Anutu mi negemmi-dae, yeni feracyunuma faka mangana anude.

<sup>9</sup> Anu ngac hodzec mong ye kifaya 60 bic ferahema ngic mocguac ngac kefec, yeac kpacsac ngac hodzec yeneac kibiu arenggebesonga. <sup>10</sup> Amma angammemea gombunga feec nga fede, imoc ngicngac sasawango bic hennegeng angkegcec. Imoc yofi, ye nambaracfora gombunga yenenggareng angkefec nga ngicngac edoc bedoc ayemmekefec amma ngicngac kpetiac haningina dzuacyemmekefec. Ye ngicngac ebicfu kegcec meseriyunukefec amma ngicngac meficyunuudeac naso mong mi ukukefec.

<sup>11</sup> Ngac hodzec afo engeng kecdaengoc ge yeneac kpac areng imohai mi ohobesena. Yeni Kristoac modzongina tiu ngicac songo monggoc negemma ngicfu kembeso anggecde. <sup>12</sup> Yeni warac yoac dzegegec, imoc wama yoacfu makpema ebic meficgegecde. <sup>13</sup> Amma yeni oyong kecma amayuguc kengkecgecde. Nga imocsac kpac, yeni ifingoc yoac gubekisang amma kpounec nga yoac goa yeneac wiac me dedeacsoc mi ammanu imoc sifu degecde. <sup>14</sup> Imocac amma ngac hodzec afo engeng kecdaengoc yeneac negemma areng yofi faiba modacbisia. Yeneng ngic monggoc mema sabac meficgema amangina

garenggebisia. Yeni ifi anggec ngabafocnina kecdae, yeneng yoac mangana deyemmegecdeac sing naric mi meficgegecde.

<sup>15</sup> Ngac hodzec goa yeni sing bic segema Satang modacgec. <sup>16</sup> Nga negen negensinggoc ngac kecdae, yeneac amau ngac hodzec goa kecdae yeneng heimefic ayemmegec kpebung yenearu ebic mi fingecebo. Kpebung ngeneng ngac hodzec makpekpea memeficngina kpac yombong kecdae, yeni ine heimefic ayemmebisia.

<sup>17</sup> Ngic enara habu gombunga ngenenggareng angemmemma uangina meandae, yeni eweheihei ayemmema uaac bung yemmebesonga. Yeni yoac dekperagima edekpou angemmemma uatoa mema kecdae, yeneacnoc negensibisia.

<sup>18</sup> Mitikibingo imocac yofi dede,  
 “Burumakango wit sebera kpetiudeac uatoa mema wit witiau tima yerecgeande, imocac dumbenga mi dzegebesena.” (*Dedeseri 25:4*)

nga

“Uangic yeni uanginango uabungngina meficgebeso, imocngo ngereeude.” (*Ruka 10:7*)

<sup>19</sup> Amma mongngo ngic enara mong yoacfu faibesonga negenudeu, ngeni yoac imoc hepupa kpac mi negembisia. Ngic yohockang me harebecngo yoac imocac hepuc angemegec, imohai yoac imoc negembisia. <sup>20</sup> Yeni ngicngac yeneac kicfu kopocsic meficgegecdeu, geng ifingoc ngicngac yeneac kicfu demeting seria ayemmena ngicngac tosea yeni ifi hemma yenaoc kekecngina isinggegecde. <sup>21</sup> Anu ni Anutu nga

Yesu Kristo amma angero meisingyunuyunuya, yeneac kicfu yoac imoc modacnadeac seria edeguduae. Ge ifingoc negeung yoac mi debesena me monde monde mi ambesena. <sup>22</sup> Nga mariga ngicngac yeneac witiu bic faima mi kenecyunubesena. Ngicngac yeneac kopocsicfu mi torokpebesena. Ge kpetiac kecbesena. <sup>23</sup> Herekiki nga hafei homac anggengande, imocac doku tehecsac mi nebesena. Ge ine heregaac amma waing kapianec ifingoc nebesena.

<sup>24</sup> Ngic goa yeneac kopocsic didiu bic fede, yeni yoacfu bic enggecde. Nga goa yeneac kopocsic sufufu sufufu fede, yeni yoacfu ngade enggedengoc. <sup>25</sup> Ifi isocngoc angammeme gombunga goa yaguc didiu fede. Nga angammeme gombunga goa yaguc didiu mi fede, imoc kecma sufufu sufufu naric mi feude.

## 6

<sup>1</sup> Mong ye wanac arenggac tofo bageau kecdaengo mingingfocngina eweheihei ayemmegec ngereeude. Ifi anggec ngicngac yoac kpouyemmeing nga Anutuac kpac, imoc naric mi demanganengecde. <sup>2</sup> Nga wanac areng goa yeneac mingingfocngina negen negensinggoc kecdae. Yeni negen negensinggoc tosofocnina andae, ifi dema negengyemmegec mamea mi ambeso. Yeni ine wanac arenggac siricfu songogoc torokpema mingingfocngina monggoc yombong kingang kpeyemmebisia. Yeni wanac areng yenigoc Yesu negensinggema heresongogoc hoangemema kecdae. Yofinenggac mingingfocngina siricngina ifia kecdaeac, wanac arenggo yeneac amma

ua gombunga yenearu mebisia. Ge faka imoc kpouyemmema herengina midibesena.

<sup>3</sup> Ngic mong ye netohoma sing mong kpoungem-mema Kebunina Yesu Kristoac yoara dindingac wama Anutuac faka nga sing kpoungemmeing, imoc ngadeheande, <sup>4</sup> ngic ifia ye hereau sebieng-geng fede amma ye wiac mong mi negende. Yeac songo ine manganagoc kekec nga ngic yenigoc nesisic yoc nga negen negeng hania hania de-ande, faka ifia keracmangang nga ngabasiric amma yoc mangana nga negeung meficgeude.

<sup>5</sup> Ngicngac ifia yeni negen negengngina fonggou ngaba wisic wisickea kpac angemeandae. Yoc fora imoc ubanginaunac bic meic meickea, mong-goc mi fede. Yeni dzofinac meficgegecdeacsac Anutuac faka nga sing modacbesonga negensi-dae.

<sup>6</sup> Fora, mong ye dewaidzoha kpac ruaegoc kecma Anutuac faka nga sing modackecde, yeng sing imohai wiac gombunga homac meficgeude.

<sup>7</sup> Ni foracngoc deduae, bangectoa bangec yomohai entegeng fingering. Nga bangectoa bangec yomoc wama kembesonga dema ifingoc entegeng kennide. <sup>8</sup> Semeng nga wambanina soha fenemmeudeu ruaegoc dewaidzoha kpac yumia kecbisina.

<sup>9</sup> Ngicngac dzofinactoagoc anggecdeac negengareng angandae, yeni faitobannu kecma mangana minginaac botacfu emma sebiac songo modacma kapa faka amma kekecngina memanganegecde. Faka ifiango memanganeyunuu kpac anggecde. <sup>10</sup> Imoc yofiac, hiedzoac songo negen negeng, imocngo

mangana sasawaac hania. Ngicngac goa yeni hiedzoac songo kuneng mekecdae, imocngo negen negensingnginau wangecyunuu kemma hereebic kuneng meficgeyemmeude.

<sup>11</sup> Anutuac ngic, ge faka imoc hemma ngadehema woramibesena. Kecec dindingac modacma Anutuac faka nga sing kekecgau seriudeac mamangkima Yesu negensinggema Anutu nga ngicngac heresongogoc hoangyunuma modzotitia kpac kecma kecec yumea mekecbesena. <sup>12</sup> Negen negensinnu magubacac dzikac gombunga kpema nedzibesena. Amma uatoa mema nedzima kekecseriu hasikenade. Imoc menadeac Anutungo kpacguec. Amma sing gombunga imoc modacbeso anec, imoc warac ngicngac yeneac kicfu deficgena hepuc anggengcec.

<sup>13</sup> Anu Anutungo wiac sasawa kekecnginagoc faiec nga Yesu Kristo yeng Pontio Piratoac kicfu haniaya gombunga deficgeec, yereng hepucna anec yofi edeguduae, <sup>14</sup> dederecgeyoac negenec, imoc modacma goctopoha nga kopocsiha kpac, imoc mekecmana Kebunina Yesu Kristoac hahanasoya fingectegebessande. <sup>15</sup> Nga Anutu yengenaoc nasoya negende, imoc fingecbesande. Anutu ye kenehagoc ye tembuha Kuctoa mingina nga yeng ngictau yeneac Ngictau nga kebu yeneac Kebu. <sup>16</sup> Ye mocgungo dzonggo dzongoya kpac nga kperagia manau kecde. Nga kperagi imocac manau ngic mongngo naric mi enude, kpac. Amma kperagi imoc mongngo mi henec nga naric mi henude. Kuha nga eweheihei yearu fecngoc fede nga nasoya kpac fekengkecbessande. Imoc

fora.

<sup>17</sup> Ngicngac naso yomohai dzofinactoanginagoc kecdac, yeni sebiengeng mi anggecdeac nonoseria edeyunubesena. Dzofinac imocngo tinanannina seria kpac. Anutungo wiacnina hania hania songogoc mekecnideac meficgenemmekecde, yeng tinanangngina ambeso, imoc edeyunubesena. <sup>18</sup> Yeni ua gombunga mekecmagec angammemengina gombungango hiedzotoangina ambeso. Amma yeni wosoefac amma iwaingina mekecdac, imoc medereyemmema kegcgecdeac demeseri amma edeyunubesena. <sup>19</sup> Yeni ifi mekecma kekecngina ngade haude, imohai dzofinacngina tohong kpema tatic gombunga mengeregecde. Mengerema kekec forau hasikebesandae.

<sup>20</sup> O, Timoteo, Anutungo wiac garenggenadeac genec, imoc gombunga garenggekecbesena. Amma bangecac siduc nga yoac sicsauha hania hania, imohacnac wadzahemima worabesena. Ngic goa yofi deandae, “Neni yoac negen negengtegehagoc mekecdimbe.” nga yoacngina imocngo yoac kpekpe ande. Ge imoc negemma ngadehebesena. <sup>21</sup> Anu ngic goa yeneng negen negentegec imohai kpeketahema negen negensinggac sing segegec. Anutuac danggunucngo ngenigoc febeso.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 3 Mar 2023 from source files dated 9 Oct 2020

19b7c48c-f4ce-5007-838d-58f01dc01ecc